

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১৮/২০১৭-১৮

ঢাকা, মঙ্গলবার ২৫ জুলাই ২০১৭, ১০ শ্রাবণ ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। অগ্রাধিকারভিত্তিক বাণিজ্য চুক্তির অনুমোদন : মন্ত্রিসভার ৭৪ সিদ্ধান্তের ৫৩টি বাস্তবায়ন
- ২। ভালো চলচ্চিত্র নির্মাণে সহযোগিতা দেবে সরকার : প্রধানমন্ত্রী
- ৩। অংশীজনের সঙ্গে ৫৭ ধারা নিয়ে বৈঠক করুন : তথ্যমন্ত্রীর প্রধানমন্ত্রী
- ৪। মৎস্য খাত রক্ষায় নজরদারি বাড়াতে হবে : রাষ্ট্রপতি
- ৫। তিন দিনের ডিসি সম্মেলন শুরু আজ : গুরুত্ব পাবে আইন-শৃঙ্খলা ও নির্বাচন
- ৬। শুল্ক জটিলতা দূর করা হলে রপ্তানি বাড়বে : বাণিজ্যমন্ত্রী
- ৭। কোচিং বাণিজ্য বন্ধে আইন হচ্ছে: শিক্ষামন্ত্রী
- ৮। চার শতাধিক যাত্রী নিয়ে হজ ফ্লাইট সৌদি আরবের জেদ্দায় পৌঁছেছে
- ৯। ঢাকা দক্ষিণ সিটির ৩,৩৩৭ কোটি টাকার বাজেট ঘোষণা
- ১০। মোবাইল নম্বর ঠিক রেখে অপারেটর পরিবর্তন সেবা অনুমোদন

১। অগ্রাধিকারভিত্তিক বাণিজ্য চুক্তির অনুমোদন : মন্ত্রিসভার ৭৪ সিদ্ধান্তের ৫৩টি বাস্তবায়ন

ডি-৮ ভুক্ত আটটি মুসলিম দেশের মধ্যে অগ্রাধিকারভিত্তিক বাণিজ্য চুক্তি অনুসমর্থনের প্রস্তাব অনুমোদন দিয়েছে মন্ত্রিসভা। চলতি বছরের জুন থেকে আগস্ট পর্যন্ত ৩ মাসে ৯টি মন্ত্রিসভার বৈঠকে মোট ৭৪টি সিদ্ধান্ত নেয়া হয়। এর মধ্যে বাস্তবায়ন হয়েছে ৫৩টি। ২১টি সিদ্ধান্ত বাস্তবায়নধীন। এ সময়ে সিদ্ধান্ত বাস্তবায়নের হার ৭১ দশমিক ৬২ শতাংশ। এ বছরের দ্বিতীয় ত্রৈমাসিকে মন্ত্রিসভা বৈঠকের গৃহীত সিদ্ধান্ত বাস্তবায়ন বিষয়ক এক প্রতিবেদনে এ তথ্য জানানো হয়। গতকাল ২৪ জুলাই সোমবার সচিবালয়ে প্রধানমন্ত্রী শেখ হাসিনার সভাপতিত্বে অনুষ্ঠিত মন্ত্রিসভার নিয়মিত বৈঠকে প্রতিবেদনটি উপস্থাপন করা হয়। বৈঠক শেষে মন্ত্রিপরিষদ সচিব মোহাম্মদ শফিউল আলম এ তথ্য জানান। সূত্র-ইনকিলাব (পৃ.১,ক.৬), ডেইলি সান, (শেষ পৃ.,ক.১), ইন্ডিপেনডেন্ট (শেষ পৃ.,ক.২)।

২। ভালো চলচ্চিত্র নির্মাণে সহযোগিতা দেবে সরকার : প্রধানমন্ত্রী

প্রধানমন্ত্রী শেখ হাসিনা দেশের ইতিহাস, সংস্কৃতি ও কৃষ্টিকে তুলে ধরে উন্নত ধারার চলচ্চিত্র নির্মাণের আহ্বান জানিয়েছেন। এ জন্য চলচ্চিত্র নির্মাতাদের প্রয়োজনীয় সব ধরনের সহযোগিতা দেওয়ারও আশ্বাস দেন। তিনি বলেন, আমরা চাই যারা চলচ্চিত্র নির্মাণ করেন তারা আরও উন্নতমানের এমন সিনেমা করবেন, যা আমাদের ইতিহাস, ঐতিহ্য, সংস্কৃতি, কৃষ্টি সবকিছু ধারণ করতে পারে। পাশাপাশি আন্তর্জাতিকভাবেও আমাদের এই শিল্প আরও মর্যাদা অর্জন করতে পারে। এ জন্য প্রয়োজনীয় সব ধরনের সহযোগিতা দেওয়া হবে। প্রধানমন্ত্রী গতকাল ২৪ জুলাই সোমবার বঙ্গবন্ধু আন্তর্জাতিক সম্মেলন কেন্দ্রে জাতীয় চলচ্চিত্র পুরস্কার-২০১৫ বিতরণ অনুষ্ঠানে প্রধান অতিথির ভাষণে এ কথা বলেন। সূত্র-সমকাল (শেষ পৃ.,ক.১), সংবাদ (শেষ পৃ.,ক.৬), ডেইলি সান (পৃ.১,ক.২), ইন্ডিপেনডেন্ট (শেষ পৃ.,ক.১)।

৩। অংশীজনের সঙ্গে ৫৭ ধারা নিয়ে বৈঠক করুন : তথ্যমন্ত্রীকে প্রধানমন্ত্রী

৫৭ ধারায় কী আছে তা ব্যাখ্যা দেওয়ার জন্য অংশীজনের সঙ্গে একাধিকবার বৈঠক করার নির্দেশ দিয়েছেন প্রধানমন্ত্রী শেখ হাসিনা। প্রধানমন্ত্রী বলেছেন, আইনটির যাতে অপব্যবহার না হয় তা সতর্কতার সঙ্গে দেখতে হবে। ৫৭ ধারার পরিবর্তে প্রচলিত আইনে মামলা করা যাবে কি-না তাও দেখতে হবে। গতকাল ২৪ জুলাই সোমবার সচিবালয়ে মন্ত্রিসভার নিয়মিত বৈঠক শেষে অনির্ধারিত আলোচনায় প্রধানমন্ত্রী এ কথা বলেন। তথ্যমন্ত্রী হাসানুল হক ইনু প্রধানমন্ত্রীকে জানান, ৫৭ ধারার আইন কোনো সাংবাদিকের বিরুদ্ধে অপপ্রয়োগ করা হচ্ছে না। যারা সাইবার ক্রাইম করছেন, সুনির্দিষ্ট অভিযোগের ভিত্তিতেই তাদের বিরুদ্ধে মামলা হয়েছে। উদ্দেশ্যমূলক কোনো সাংবাদিকের বিরুদ্ধে এ ধারায় মামলা করা হয়নি। সরকারের সুরক্ষার জন্যই আইনে এ ধারা সংযোজন করা প্রয়োজন। তিনি অংশীজনের সঙ্গে এ ধারা নিয়ে আলোচনা করবেন বলে জানান।

সূত্র-সমকাল (পৃ.১,ক.৫), জনকণ্ঠ (পৃ.১,ক.১) ইন্ডিপেনডেন্ট (পৃ.১,ক.১)।

৪। মৎস্য খাত রক্ষায় নজরদারি বাড়াতে হবে : রাষ্ট্রপতি

রাষ্ট্রপতি মো. আবদুল হামিদ বিভিন্ন প্রজাতির মিঠাপানির মাছ চাষ ও সংরক্ষণ এবং দেশের গুরুত্বপূর্ণ এই মৎস্য খাতের কোনো ধরনের ক্ষতি প্রতিরোধে কঠোর নজরদারি নিশ্চিত করতে কার্যকর পদক্ষেপ গ্রহণের জন্য সংশ্লিষ্ট কর্তৃপক্ষ, বিশেষ করে মৎস্য ও প্রাণী সম্পদ মন্ত্রণালয়ের প্রতি আহ্বান জানিয়েছেন। রাষ্ট্রপতি জাতীয় মৎস্য সপ্তাহ-২০১৭ পালন উপলক্ষে গতকাল ২৪ জুলাই সোমবার বঙ্গবন্ধুর দরবার হলে আয়োজিত এক অনুষ্ঠানে এ কথা বলেন। সূত্র-জনকণ্ঠ (পৃ.১,ক.৮), প্রথম আলো (পৃ.২,ক.৫), নিউজ টুডে (পৃ.৩,ক.২), বাংলাদেশ টুডে (পৃ.৩,ক.১)।

৫। তিন দিনের ডিসি সম্মেলন শুরু আজ : গুরুত্ব পাবে আইন-শৃঙ্খলা ও নির্বাচন

জেলা প্রশাসকদের (ডিসি) তিন দিনের সম্মেলন শুরু হচ্ছে আজ ২৫ জুলাই মঙ্গলবার। প্রধানমন্ত্রীর কার্যালয়ের শাপলা হলে আজ সকাল সাড়ে ১০টায় এ সম্মেলনের উদ্বোধন করবেন প্রধানমন্ত্রী শেখ হাসিনা। আওয়ামী লীগ সরকারের টানা দ্বিতীয় মেয়াদে শেষ পর্যায়ের সম্মেলন এটি। সিটি করপোরেশন ও জাতীয় সংসদ নির্বাচন, দেশের আইন-শৃঙ্খলা পরিস্থিতি, সরকারি কাজ বাস্তবায়নে প্রতিবন্ধকতা দূর করতে আইনি সুরক্ষাসহ আরও বেশ কিছু জনগুরুত্বপূর্ণ বিষয় নিয়ে এ সম্মেলনে আলোচনা করা হবে। এ ছাড়া সাম্প্রতিক সময়ে দেশজুড়ে ঘূর্ণিঝড়, মোরা,

বন্যা, বাঁধভাঙন ও পাহাড়ধস সম্পর্কিত আলোচিত বিষয়গুলোও সম্মেলনে আলোচনায় থাকছে। সূত্র-সমকাল (পৃ.১,ক.১), ইত্তেফাক (শেষ পৃ.,ক.৮), ডেইলি সান (পৃ.১,ক.৮), ইন্ডিপেনডেন্ট (পৃ.১,ক.২)।

৬। **শুল্ক জটিলতা দূর করা হলে রপ্তানি বাড়বে : বাণিজ্যমন্ত্রী**

উন্নত দেশগুলোতে শুল্ক জটিলতা দূর করা হলে বাংলাদেশের পণ্য রপ্তানি আরও বাড়বে বলে জানিয়েছেন বাণিজ্যমন্ত্রী তোফায়েল আহমেদ। তিনি বলেন, শুল্ক জটিলতার কারণে বাংলাদেশের রপ্তানি অনেক ক্ষেত্রে বাধাগ্রস্ত হচ্ছে। বিশ্ববাণিজ্য সংস্থার সিদ্ধান্ত মোতাবেক উন্নত বিশ্বের দেশগুলো এলডিসিভুক্ত দেশগুলোকে ডিউটি ও কোটা ফ্রি বাণিজ্য সুবিধা প্রদান করার কথা, কিন্তু অনেক উন্নত দেশ সে সুবিধা দিচ্ছে না। বিভিন্ন ধরনের শুল্ক জটিলতার কারণে রপ্তানি বাধাগ্রস্ত হচ্ছে। গতকাল ২৪ জুলাই সোমবার বাণিজ্য মন্ত্রণালয়ের অফিস কক্ষে বাংলাদেশ সফররত ওয়ার্ল্ড কাস্টমস অর্গানাইজেশন এর সেক্রেটারি জেনারেল কোনিও মিকুরিয়া এর সঙ্গে সাক্ষাতের সময় তিনি এসব কথা বলেন। সূত্র-সংবাদ (পৃ.১৪,ক.৩) সমকাল (পৃ.১৯,ক.৮), ইন্ডিপেনডেন্ট (পৃ.৯,ক.১), বাংলাদেশ টুডে (পৃ.১০,ক.২)।

৭। **কোচিং বাণিজ্য বন্ধে আইন হচ্ছে: শিক্ষামন্ত্রী**

শীঘ্রই আইন করে কোচিং বাণিজ্য বন্ধ করা হবে এবং কোচিং বাণিজ্য সংশ্লিষ্ট শিক্ষকদের বিরুদ্ধেও কঠোর ব্যবস্থা নেওয়া হবে বলে হুঁশিয়ারি দিয়েছেন শিক্ষামন্ত্রী নুরুল ইসলাম নাহিদ। গতকাল ২৪ জুলাই সোমবার বিশ্বসাহিত্য কেন্দ্রে সেকায়েপ আয়োজিত পাঠাভ্যাস উন্নয়নে সেরা সংগঠক সম্মাননা প্রদান অনুষ্ঠানে প্রধান অতিথির বক্তব্যে তিনি এ কথা বলেন। সূত্র-সংবাদ (শেষ পৃ.,ক.১), ইনকিলাব (পৃ.১১,ক.১)।

৮। **চার শতাধিক যাত্রী নিয়ে হজ ফ্লাইট সৌদি আরবের জেদ্দায় পৌঁছেছে**

বাংলাদেশ থেকে চলতি মৌসুমের প্রথম হজ ফ্লাইট সৌদি আরবের জেদ্দায় পৌঁছেছে। গতকাল ২৪ জুলাই সোমবার স্থানীয় সময় বেলা সোয়া ১১টায় বিমানটি জেদ্দার কিং আবদুল আজিজ বিমানবন্দরের হজ টার্মিনালে পৌঁছায়। গতকাল ২৪ জুলাই সোমবার সকাল ৭টা ৫৫ মিনিটে ৪১৮ জন হজযাত্রীর এ দলটিকে নিয়ে বিমান বাংলাদেশ এয়ারলাইনসের ফ্লাইটটি ঢাকা ত্যাগ করে। বিমানবন্দরে উপস্থিত থেকে উদ্বোধন ফ্লাইটের হজযাত্রীদের বিদায় জানান বেসামরিক বিমান পরিবহণ ও পর্যটনমন্ত্রী রাশেদ খান মেনন এবং ধর্মমন্ত্রী মতিউর রহমান। সূত্র-সংবাদ (পৃ.১,ক.৫) ইনকিলাব (শেষ পৃ.,ক.৬), ডেইলি সান (পৃ.১,ক.৪), নিউজ টুডে (পৃ.১,ক.৩)।

৯। **ঢাকা দক্ষিণ সিটির ৩,৩৩৭ কোটি টাকার বাজেট ঘোষণা**

ঢাকা দক্ষিণ সিটি করপোরেশনের (ডিএসসিসি) উন্নয়ন ব্যয়কে প্রাধান্য দিয়ে ২০১৭-১৮ অর্থবছরের (প্রস্তাবিত) জন্য ৩ হাজার ৩৩৭ কোটি ৬৭ লাখ টাকার বাজেট ঘোষণা করা হয়েছে। বাজেটের শতকরা ৭৭ ভাগ উন্নয়নে খরচ করা হবে। গতকাল ২৪ জুলাই সোমবার নগর ভবনের মেয়র মোহাম্মদ হানিফ অডিটরিয়ামে এক অনুষ্ঠানে ডিএসসিসির মেয়র সাঈদ খোকন এ বাজেট ঘোষণা করেন। সূত্র-সংবাদ (শেষ পৃ.,ক.১) সমকাল (পৃ.৩,ক.৬), ডেইলি সান (শেষ পৃ.,ক.৮), ইন্ডিপেনডেন্ট (পৃ.৩,ক.৭)।

১০। **মোবাইল নম্বর ঠিক রেখে অপারেটর পরিবর্তন সেবা অনুমোদন**

নম্বর ঠিক রেখে মোবাইল ফোন অপারেটর পরিবর্তন তথা এক সিমেরই সব অপারেটরের সুবিধা বা এমএনপি (মোবাইল নম্বর পোর্টেবিলিটি) সেবা চূড়ান্ত অনুমোদন পেয়েছে। গতকাল ২৪ জুলাই সোমবার টেলিযোগাযোগ প্রতিমন্ত্রী তারানা হালিম বিষয়টি নিশ্চিত করেছেন। সূত্র-ইত্তেফাক (পৃ.১,ক.৫)।

সম্পাদকীয়

ক. সংবাদ, ইনকিলাব, ভোরের কাগজ, যুগান্তর, সমকাল, প্রথম আলো, যায়যায়দিন, ডেইলি সান, ডেইলি স্টার, নিউজ টুডে, অবজারভার : উচ্চ মাধ্যমিক ও সমমানের পরীক্ষায় পাসের হার ও জিপিএ-৫ পাওয়া শিক্ষার্থীর সংখ্যা গতবছরের তুলনায় কমে যাওয়ার কথা উল্লেখ করে উত্তীর্ণ শিক্ষার্থীদের অভিনন্দন জানিয়ে মেধার উন্নয়ন ও যথাযথ মূল্যায়ন কামনা।

- খ. **যুগান্তর** : ঢাকার আঞ্চলিক খাদ্য কর্মকর্তা এবং ঢাকা ও নারায়ণগঞ্জ জেলা খাদ্য নিয়ন্ত্রক নারায়ণগঞ্জ সেন্ট্রাল স্টোরেজ ডিপো পরিদর্শনে গেলে সেখানে ত্রিপলে ঢাকা স্কুপে চালের বদলে বাঁশ ও কাঠের তৈরি ড্যামেজ পাওয়া যাওয়ায় নিন্দা জানিয়ে এ ধরনের দুর্নীতির বিরুদ্ধে কঠোর ব্যবস্থা নেওয়ার দাবি।
- গ. **সমকাল** : পোশাক শিল্পের শ্রমিকদের প্রশিক্ষণের মাধ্যমে দক্ষ করে তোলার ওপর গুরুত্বারোপ।
- ঘ. **ইন্ডিপেনডেন্ট** : দেশের সমুদ্র সম্পদ আহরণ ও সুরক্ষায় দক্ষ সম্পদ গড়ে তুলতে চট্টগ্রাম ছাড়াও দেশের অন্যান্য স্থানে সমুদ্র সম্পদ সংক্রান্ত ইনস্টিটিউট গড়ে তোলাসহ বিদ্যমান ইনস্টিটিউটের সমস্যাগুলো জরুরিভিত্তিতে সমাধানের ওপর গুরুত্বারোপ।
- ঙ. **ডেইলি সান** : ঢাকার চারপাশের বুড়িগঙ্গা, তুরাগ, ধলেশ্বরী, বালু ও শীতলক্ষ্যা নদীগুলো দখল ও দূষণে বিপন্ন হয়ে পড়ায় সংশ্লিষ্ট সংস্থাকে এসব নদী রক্ষায় কঠোর পদক্ষেপ নেওয়ার আহ্বান।
- চ. **নিউ এজ** : দেশের বাণিজ্যিক ব্যাংকগুলোর অধিকাংশই সাইবার হামলা মোকাবিলায় যথাযথ সাইবার নিরাপত্তা জোরদার না করায় অতিদ্রুত সাইবার সিকিউরিটি শক্তিশালী করার সুপারিশ।
- ছ. **ডেইলি স্টার**: মালয়েশিয়ার কুয়ালালামপুর বিমানবন্দরে ভ্রমণ সংক্রান্ত বৈধ কাগজপত্র থাকা সত্ত্বেও বাংলাদেশি বৈধ কর্মী ও স্বনামধন্য বাংলাদেশি নাগরিকদের হেনস্তা হওয়ার ঘটনা তুলে ধরে বাংলাদেশে অবস্থিত মালয়েশিয়ান হাইকমিশনকে বিষয়টি গুরুত্বের সঙ্গে বিবেচনায় নিয়ে যথাযথ পদক্ষেপ নেওয়ার আহ্বান জানিয়ে সম্পাদকীয় প্রকাশ।

উপ-সম্পাদকীয়

ইত্তেফাক পত্রিকায় প্রকাশিত কলামে উল্লেখ করা হয়েছে, নির্বাচন ছাড়া গণতন্ত্রের সুষ্ঠু চর্চা সম্ভব নয়।

নিবন্ধ ও ফিচার

সংবাদ পত্রিকায় প্রকাশিত ‘ওবিসিটি একটি স্বাস্থ্য সমস্যা : সচেতনতাই সহজ সমাধান’ শিরোনামের নিবন্ধে অভিমত প্রকাশ করা হয়েছে, ওবিসিটিকে জটিল স্বাস্থ্য সমস্যা হিসেবে বিবেচনা করে এর প্রতিকারে আমাদের সচেতন হতে হবে।

#

ডালিয়া/শুকলা/মরজিনা/সাইদা/তানিয়া/২০১৭/৯.০০ঘন্টা

